

432

139

DEO OPTIMO MAXIMO
UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono.

QUÆSTIO MEDICO-CHIRURGICA,

QUOD LIBETARIIS DISPUTATIONIBUS

manè discutienda in Scholis Medicorum, die Martis quintâ
mensis Maii, anno Domini M. DCC. LXXII.

M. JOANNE-BAPTISTA MUNIER,

Consiliario Medico Regis ordinario & Domus Regiæ Invalidorum,
Doctore Medico, Præsiede.

An vulneribus unicum linteum captum?

I.



B uno simplici medio exquisitissimos elicere effectus summum
sæpe tum in cæteris artibus, tum in Medicinâ peritiæ fastigium. O
angustum humani captum ingenii! qui imperitus peritum, pe-
ritus imperitum se existimat; quò doctior aliquis, eò plura se
latere scientiæ penetrabilia; quò peritior, eò plures superesse
naturæ industrias artem fugientes detegit. En præ manibus habes nostri arca-
num remedii: jacent alii præstantem medicaminum suorum efficaciam, hæc
nostri vis propria nullâ vi suâ præpollere. Miraris? attende ad causam reme-
diorum efficacem. Quænam ea sit alia quàm eximia illa vis à summo numine
singulis corporibus, singulis corporum partibus insita, in varios acta motus,
ab eo solo in brutis, ab animâ etiam cogitante in homine directâ, vivi corpo-
ris organum, Natura. Nec enim fefellit nec fallitur in eâ re germanæ Medicinæ
parens Hippocrates. *Verus morborum medicus Natura.* Nùm etenim sanat ipse per
se vir Medicus, nùm sanant medicamenta, varia ac contraria eundem sæpissime,
eadem varium ac contrarium effectum promoventia? Minime: sanat, si vires
Deus addiderit, si apta interdum Medicinæ auxilia præstiterint homines, in-
gesta propriis organis recipiens, tum calore ingenito, administrisque spiritibus
& variis intra solida elaboratis humoribus coquens, digerens, bona deinde

secernens, mala excernens, Natura. Quid profit morituro remedium præstantissimum, si sanare Natura deneget? Hujus nosce potentiam, hujus varios huc & illuc effectus scrutare, hujus vestigia sequere semper ministrando, nunquam compellendo, aut perturbando; eris mox tandem perfectus tum in internis, tum in externis medicus; erit tibi eximiâ interdum arte composita, sed sæpissime simplex, brevis, delecta tamen medicamentorum suppellex. Quod de omnibus morbis externis dictum, id de vulneribus potissimum intellige: eorum etenim tota curatio tota Naturæ opus. Vulnus solutio partium mollium ab instrumento externo facta. In eo igitur totus volvitur curationis cardo ut partes à se invicem disjunctæ jungantur, agglutinentur. Glutinis materiem præbebit idem qui & nutritionis: nutrit sanguis; ergo & partes conglutinat. Is scilicet à finibus vaporum intrâ parietes vulneris reptantium, necnon & à carniū porositatibus hinc inde roris instar refudat, à naturali calore partis elaboratur, excoquitur, densatur, fit viscidior, jam pus est, mox caro; tandem nullum vulneris vestigium remanet. Illud itaque quò unice tendit curatio, ut partes agglutinentur, à naturâ solâ perficitur.

I I.

SED priùsq̃uam hunc naturâ finem attingat, plura sunt ei propellenda obstacula. Ubi vulneratur pars aliqua corporis, statim atque carnes solvuntur, simul vasa rumpuntur, spiritus distrahuntur, intra corpus aëri, insolito inimicoque advenæ, patet aditus; inde hæmorrhagia, dolor, sordium interdum aut cum instrumento, aut cum aëre intromissio, roboris ac caloris nativi partis jactura, & ex eâ jacturâ carniū imbecillitas, laxitas, humiditas; seri tenuis, acris, luteo-nigricantis scaturigo, malignorum hinc inde totius corporis humorum ad vulnus appulsus, quæ mala dum à repetitis deligationibus foventur ac renovantur, puris impeditur probi generatio, nec carnes agglutinari, nec cutis ora ad se invicem sinuntur accedere. Hos effectus potiùs quàm causam attendentes medici antiqui multiplici medicamentorum apparatu vulneris sanationem aggrediebantur, nec bene curatum arbitrabantur nisi vicissim astringentia, tum abstergentia, deinde suppurantia, farcotica, cicatrizantia adhibuissent medicamenta. Quoties ea mutabant, toties vulnus exacerbabatur, causæ symptomatum recrudescabant, natura in suo molimine conturbabatur & curatio arte incepta, arte in longum tempus producebatur.

Eâ processere methodo Medici antiqui priores, Galenicique deinde, tum Galeni vestigiis insistentes Arabici, dum tandem novum medicinæ lumen afferret abditas perscrutata naturæ latebras Chymia; Paracelsus aliique hujus generis sub Mumie, Balsami nativi, Archei, spirituum nomine naturam obvelantes huic primum dedere in vulnerum curatione locum: nondum tamen frequentiorum deligationum jugum excusserant. Hiscè circiter temporibus Medicus in Italia

insignis Magatus, pretiosissimum circa hunc finem opus conscripsit & invidiis rationibus raræ vulnerum medicationis præstantiam exhibuit; imò solo vulneris tegumento, appposito medicamento quocumque, interdum etiam contrario, vulnera sanari testatus est, quanquam in vulneribus curæ difficilioris non parum nocuerit hæc proprii pro vulnerati temperamento, pro vulneris statu, medicamenti inscitia: enim vero hanc medicamentorum varietatem ignorare medicum dedecet, quæ citiorem sæpe afferunt medicinam, & in vulneribus periculosioribus momenti sunt quam maximi. In simplicioribus vero quæ ad obvium quemque pertinent præstantius nullum reperiri aperte pronuntiavit celeberrimus Sharp quam *lintheum carptum*. Hanc denique methodum repetitâ experientiâ comprobavit illustri Chirurgorum Parisiensium Academia.

Nec vero alia fere est quam sponte indigitaverat natura, curatio. Primis mundi nascentis incunabilis, quo tempore nondum terram infestaverat vitiorum cohors, nondum sanguinem exagitaverant iracunda, dissolverant morosa animi pathemata, nondum plethoricos invexerat morbos carniū ingluviēs, melancholicos otium plusquam foemininum, solus fere morbus vulnera; medicus suus sibi quisque. Quod fors obtulerat, quod experientia confirmaverat, remedium arripiebat. Sic herba proximo lapide confusa, sæpe obvia quæque, subito vulneri apposita, ibique dum sponte caderet relicta, pro omni variorum medicamentorum suppellestili adhibebatur, totamque sola perficiebat curationem. Vis penetrare propriam remedii vim & efficaciam? herbam quamcumque dissecâ, contunde: præter emanantem interdum succum astringentem, balzanicum, interdum fere nullum, habebis ex confusis herbæ fibris quamdam *linamenti carpti* speciem, habebis quemadmodum ex *lintheo carpto* tegumentum molle solum curando vulnere idoneum,

III.

QUA etenim ratione tot adimplere vices astringentis, abstergentis, suppurantis, sarcotici, cicatrizantis medicamenti, unum idemque & adeò simplex poterit remedium? Intelligenti percipere non arduum. Ex dictis ipsa per se sanat natura: sed nonnihil in exequendo opere haberet impedimenti. Quid igitur Medico faciendum superest? Avertenda diligenter hæc impedimenta. Jam verò prima & maxima mali labe ab aëre externo. Hic quidem per se totus humoribus non noxius. Imo in eo ipso vita constituitur; sed quantâ perficitur elaboratione prius quàm ejus vapor subtilis in nostram transeat substantiam! primò per multiplices, conicos, exilissimos trachæ arteriæ ac venæ deinde pulmonalis ramulos quasi percolatus, tum pulmonum cordisque præcipue quod penetrat calore attenuatus, à suis fordibus, crassiorique humiditate ope expirationis repurgatus, quintam veluti suâ essentiam sanguini communicat. Hæ subeunda sunt aëri præparationes, priusquàm aditus illi intra corpus

concedatur. Sin aliter, Naturæ exurgit inimicus infensissimus. Ideo contra ejus injurias densa circa corpus cutis extenditur, vaporque præterea transpirationis undeque exhalat, quo mediante vis æris intempestiva ac noxia corrigatur nec ipsam etiam lædat cutis superficiem. Si enim vapor ille per ventum, per ventilatorium ex aliquâ cutis superficie discutiatur, statim molesta percipitur sensatio, cutis astringuntur pori, humor transpiratorius intus repercutitur, & variæ emanant catharri seu quod idem est fluxionis, rheumatis, rheumatismi species. Si adeo noxius ær cutis tantum superficiæ appellens immediate, quantò majora corpori damna inferet, si intra carnes, intra aperta sanguinis vasa pleno recipiatur alveo? Ab ipso calor naturalis partis deperditur, heterogeneæque ac nocivæ particulæ, cum aëre una coeuntes vulnere vim addunt veneniferam. Mirum forsitan quod ignem promovens ac nutriens ær externus calorem naturalem immediate applicitus extinguat: facilius intelliget qui phlogistici ab igne, æris puri ac tenuis ab impuro & crasso distinctionem percipit: cæterum si minorem rationibus fidem habeas, crede observationi: quas arbori noxas inferet æris immediata sublato cortice applicatio! quam cito putredinem pariet æris in ovum testâ lassâ aditus patefactus! quam dispar erit fracturæ cum vulnere, fracturæ sine vulnere exitus!

Hunc igitur hostem attente remove, quantò celerior ac certior erit curatio! id vero quâ ratione facilius evinces quam ope *lintei mollis carpi*, cujus laxam substantiam facile sanguis affluens penetrat & glutinis quamdam speciem efficit, quo, & ipsius cohibetur effluxus, & aditus æri fit omnino impervius.

Ex eo fonte scaturiunt aliæ fere omnes symptomatum species vulnus comitantes. Si, enim pars vulnerata ab ambienti aëre defenditur, calor naturalis fovetur, cum calore partium augetur robur, carnes suo pollentes robore ac tono minorem elabi sinunt sanguinis copiam, parcius appellant humores vicini, serumque puris probi generationem remorans supprimitur, eo evanescente pretiosum extillatur puris balsamum, si quid putridi humoris in vulnere reperiatur, cum eo consociatur & ad suam revocat indolem; cutis fungi emergunt, nec tamen altius eminent, ac luxuriant ob vim blandam *lintei carpi* mollis instar pulvinaris comprimementi. Igitur hoc solo vulneris contegendi & fovendi munere humoremque simul combibendi & astringit & abstergit & suppurationem promovet & carnes generat ac curationem mox denique cicatrice quasi appposito sigillo confirmat.

NUNC igitur dubitas de modo remedii adhibendi? Simplex intelligatur vulnus: si enim, ossis fractura, viscerum læsio accedat si vulnus, sit vetus & jam ulceris naturam usurpans, si malignum, &c. jam indicatio multiplex multiplicem requirit medicinam: si vero simplex partium mollium solutio recens, primo vulnus aquâ, vino calido, &c. expurga, sanguinem sine quantum satis est effluere, partes juxta optimum situm conjunge nec te vulneris moveat amplitudo, futuræ vices tutius ac jucundius adimplebit tela glutinata. Tum *linteum carptum* impone, fasciis vulnus ita contine ut nec laxius, nec strictius comprimatur. Cætera jam naturæ permitte.

Linteum vero *carptum* num siccum, num madidum præstat? Nunc hoc, nunc illud. Vulnus enim vel partibus carneis & sanguineis vel nerveis & exsanguibus erit insitum. Si carneis, satis exsudat hinc inde humiditatis: ne dubites *carptum linteum* siccum imponere; sinon potestate saltem actu astringentis medicamenti fungetur munere: si membranaceis, jam satis ægrè exudabit puris materia, sic cum *linteum carptum* pauciorē hanc supprimet humiditatem tenerasque admodum partes molestâ titillatione irritabit, *carptum* igitur *linteum* aquâ aliquâ, v. g. hordei combibitum appones. Unguento aliquo lenienti si omnino lubeat, obteges singulis diebus renovando, sed cave ne *linteum carptum* detrahas vulnusque detegas priusquam necessitas urgens cogerit: hanc verò cognosces ex hæmorrhagia, vehementiori partis inflammatione, retento corpore peregrino, dolore aciori, caloris imbecillitate qui vulneris excrementa depellere non valet, abcessu, foetore ex pure collecto vermium aliquando fomite, putredine, gangrenâ; pruritu denique si cæger ferre nequeat. Sed quî cooperto vulnere nec linteis exsoluto hæc detexerim? primò hæmorrhagia, inflammatio, dolor, fætor, pruritus non latebunt. Num vero latebit corporis peregrini retentio? jam illud a principio agnitum. Num excrementorum vulneris suppressio? ex propulsis & ex vulnerati sicciori seu humidiori temperamento licebit conjectare. Num abscessus? indicabit ea quæ præcessit inflammatio tumore, dolore, calore febre cognita & quæ suppuravit; suppurationis vero signum erit perseverans tumor cum dolore ac pulsu sine febre: tactu etiam inundans materia percipitur. Num putredo? facile suspicaberis ex vulnerati temperamento, ex præcedenti victûs ratione, ex qualitate excrementorum vulneris, & ex febre. Gangrenæ signum nemini ignotum repentina doloris sine causâ manifestâ cessatio. Hæc si deerint bonumque è vulnere pus emanet, nullusque aut parvus adfit dolor, partes vicinæ mollitiæ quadam cum colore bono, febris absentia gaudeant, cur deli-

gationes solvere properas? nonne ut procrastinetur vulneris curatio quam natura, nisi molestaveris, intra unius diei aut bidui spatium, si vulnus leve sit, intra septimum si gravius, si gravissimum denique per gradus intra vigesimum diem perficiet.

Tanta est huius methodi præstantia ut non vulnera solum sed & ulcera benigni moris vulneraque cum substantiæ iacturâ hoc solo remedio iterum atque iterum sanari contigerit.

V.

NUM igitur spernenda quæ tanto cum successu adhibent quotidie diversi generis vulneraria, tum simplicia, tum composita? minime gentium: eritque sane peritior is Medicus qui in iis dignoscendis erit versatissimus; sed quod tanta interdum sumptuum iactura, cum remedium si non celerius at saltem & facilius & simplicius & tutius possit adhiberi? nam innumera prostant vulneribus dicata medicamenta ex vegetabilibus, astringentibus præsertim, cardiacis, emollientibus ex resinis, balsamis, therebentinis, gummibus; ex oleo, cera, pice & terris & lapidibus medicamentosis, adipibus variorum animalium: medicamenta hæc perito medico interdum pro variis circumstantiis aurea, cum plura ex iis naturæ robur ac quasi sanguinis balsamum possint & fovere & augere: sed quoties intra manus imperiti vulnere pestem inferent ulceraque sæpe insanabilia! Olea in carnibus jam humidioribus, balsama ficciora in exsanguibus & jam vehementer inflammatis num curationem promovebunt? si verò sæpissime sanaverint ea remedia, cum idem contingat medicamentis omnino contrariis, nonne liquido patet sanationem non medicamentis deberi sed naturæ quæ invito ac reluctante pessimo medicamento, ab aëre tamen, hoste infestiore, defensa curationis opus sola perfecerit? tanta naturæ in morbis curandis potentia cuius se ministros gerunt medici peritissimi. Sed naturam sic toti imperitare Medicinæ quidam forsan indignantur nec se viles servos esse sed dominos potentes conclamabunt. Erit fastidio tot & tam multiplices naturæ gressus observare, pedetentim sequi, se citius se multo præstantius morborum curationem perfecturos, si strato sibi systemate neglectisque naturæ semitis naturam ipsam compellant, iactitabunt; non tantis egere medicum disciplinis, omnia intra angustos stridi & laxi, inflammationis & obstructionis limites contineri. Sic illorum medicina Hippocratis Medicinæ multum præstabit. Ita fari, ita ratiocinari liceat. Sed non inde minus certum manebit Naturæ imperium, quamvis isti non agnoscant: ipsaque, iis renuentibus nec prævidentibus, dum curabunt, sanabit; medicamenta, si per eam licuerit, proficient; sin, hunc è medio tollent, dum illum, iubente eadem, vitæ restituerint. Neq̃ toties Naturam novercam incusa cuius tibi retundendus impetus. Naturam

pro morbo accipis : hic tibi semper repellendus est , illa semper adjuvanda. Quantò nobilior , quantò certior , quantò pene divinius sub hoc naturæ imperantis respectu Medicina ! Jam naturæ leges ipsius sunt leges Dei. Quanta Supremi numinis , tanta ipsius naturæ legum constantia , quæ ab ipso tantum possunt immutari ; medicus vero si variis se conjecturis fluctuare conqueratur , non jam artem incuset firmissimis nec varietati obnoxiiis innixam fundamentis , sed suam ipsius incertitiam , arctas humani ingenii angustias , quæ ipsum omnes simul amplecti circumstantias prohibent , nec se tamen aliquem certitudinis gradum adipisci desperet. Ars longa , sed quæ assidua & signorum & curationum observatione possit evinci. Prudentis est medici præterita revelare , præsentem ægroti statum , veram ac propriam morbi speciem certò dignoscere , futurum eventum prædicere : periti est medici adeo naturæ auxilia diverſi generis , in promptu habere , ut semel cognitâ morbi causâ , vel remediis inexpugnabilem pronuntiet , vel simplicissimâ interdum , innocuâ naturæque omnino accommodâ methodo , statò ac prædicto tempore , sanationem afferat. Hic redivivus Hippocrates , hic verus medicus. Unde fas sit concludere.

Ergo vulneribus unicum linteum carptum.

DOMINI DOCTORES DISPUTATURI.

<i>M. Jacobus GOURLEZ DE LA MOTTE.</i>	<i>M Edmundus - Thomas MOREAU.</i>	<i>M. Anna - Claudius DORIGNY.</i>
<i>M. Simon - Antonius BRINGAUD.</i>	<i>M. Ludovicus - Petrus - Felix - Renatus LETHIEULIER, saluberrimæ Facultatis Decanus, Regis Consiliarius & in Majori Consilio , necnon in magnâ Regiæ Domûs & Franciæ Præfecturâ Medicus ordinarius.</i>	<i>M. Ludovic - Joannes - Baptista COSNIER.</i>
<i>M. Claudius - Josephus GENTIL, Militarium Nosocomiorum ad Regis exercitum Medicus.</i>	<i>M. Petrus - Ludovicus - Maria MALOET.</i>	<i>M. Petrus - Augustinus ADET.</i>

Proponēbat Parisiis CAROLUS - JACOBUS SAILLANT, Parisinus, Saluberrimæ Facultatis Medicinæ Parisiensis Baccalaureus, Theses
Auctor, A. R. S. H. 1772. A SEXTA AD MERIDIEM.

(Typis QUILLAU, Saluberrimæ Facultatis Typographi. 1772.